

Pueblo kier sa pakico e 'wheel-hub' practicamente a desaparece for di den brass band



ORANJESTAD (AAN): Matutino DIARIO a cuminza nota, cu for di algun aña caba y e aña aki ta mescos, a ricibi comentario for di varios persona cu ta disfruta di Carnaval, riba e hecho cu nan a ripara cu e brass bands di Aruba practicamente no ta uza mucho tocador di hub mas.

Antes ora cu bo tabata scucha brass banda ta yegando cerca, e sonido di e 4, 5, of te hasta 6 tocador di hub tabata trece un sabor special na e dushi musica di ritmo di e brass band.

E sonido unico di hero riba hero combina cu e snare drum, e bass drum, e tom drum, e trompetnan y e trombone-nan tabata zona manera un

combinacion perfecto. Hubi biaha e brass bands tabata uza un break, unda cu tur e musica ta para excepto e 5 tocadornan di hub y e unico cos bo tabata scucha durante algun seconde tabata: "lingi-langa, lingi-langa, lingi-langa, lingi-langa", despues di cual poco poco e snares tabata drenta, despues di cual tur e otro instrumentonan tabata cuminsa zona back.

Hubi hende cu gusta e musica di brass band a indica cu nan ta sinti falta di e sonido di hub.

Te ainda si bo wak bon, mayoria brass band tin quizas 1 of tin biaha dos

persona ta toca un campana, cu ta produci un sonido un tiki similar.

Sinembargo, e 1 of dos personanan ey no ta worde scucha suficientemente fuerte, compara cu tur e otro sonidonan di drum y trompet cu bo ta scucha.

Ta hubi cerca di e brass band bo lo tin cu para pa tende e persona ta toca e campana of porta e hub.

Hubi ta puntra nan mes kico a pone cu e wheel-hub a desaparece.

E no ta mas den style?, ningun hende kier carga e hub pasobra e ta pisa?, e generacion nobo no a siña toca e hub?.

Kico ta e motibo???...